

Je'ej ti ye'ej tyihuo'tayú'sej a'íjna i San Pablo a'íjma i maj Galacia jo'cháatima'caa

Pablo pu hua'tyojtye'

¹ Nyáaj i nyaj Pablo pué'een, camu i tyeítýee nyojo'ta'ítýaca' camu majta a'ímaj na'antyíhuoj, sulu a'íi pu i Jesús ti ajta Ciríistu' pué'een, ajta i Dios i ti tavástara' pué'een, i ti jaatájuurityej a'íjci i Jesús, ² néijmi'caa jamuán i nye'ihuáamua', yatuj já'muatyojtye' mua'ajmaj mu siaj jusi'rii a Galacia. ³ Che' i Dios ajta i tavástara' a'íjna i Jesús ti ajta Ciríistu' pué'een, miche' a'íin tyámua' tyajamuaatá'an, majta jamuaatyápua'ritye'en i já'muatzajta'. ⁴ I Ciríistu' pu huatóoa' ti huámui'nyij tajitzé ma'can, ti'ij tajapúa huatányuunyij a'íjma jimi i maj je'ej pua'aj tyityetyúucha'ij i maj a'yan huacháatimee i cháanacaj japua, a'yaa pu tya'ajxié'vi'ra' i Dios i ti tavástara' pué'een. ⁵ Tyiche' tyé'tyojtzire'ej i Dios jusén jime'. Che' a'yan tyá'ra'nyij.

Capu síj ajtáhua'aj majá'hua' i nyúucarij i ti jín i Dios tí'rátóonyij

⁶ Je'ej nu pua'aj tyo'tányamua'aj a'íjci jime' siaj jiye'tzín ajtacíj i Dios jimi, i ti jamuaatajé ja'muaséeratya'aj i Ciríistu' jimi a'chu ti já'muaxie've', mua'aj xu sij seríj séej ántzaahuaaj i nyúucarij. ⁷ Majta quee capu síj ajtáhua'aj

ì nyúucarij séejre'. Sulu séecan mu séejre' ì maj já'mua'itziitye', majta tyí'tyese' mej mij seequéj jáa'uurej ì nyúucarij ì Ciríistu' tì jaxaj. ⁸ Ajta tipua'aj a'tíj seequéj tyajá'mua'ixaatye'ej ì nyúucarij tiquee a'yan namuajre' je'ej tyaj tyeríj tyajamuáa'ixaa, che' ì Dios puéjtzij jaatá'an, capu je'ej a'tíj tì pué'een tipua'aj nyáaj, na'ríij síj ì tì tyí'huiire' u tajapuá. ⁹ Nu'ríj anaquéej a'yan tyaataxájtaca' ajta ijíj nu nyajtáhua'aj jaataxájtaj. Tipua'aj a'tíj seequéj tyajá'mua'ixaatye'ej ì nyúucarij tiquee a'yan namuajre' tì'ij ì siaj seríj ja'antzaahuaaj, che' ì Dios puéjtzij jaatá'an.

¹⁰ Canu nyáaj a'yan tyá'huoo nyej nyij tyámua' tyu'tyá'itzeere'en ì tyétyacaa jimi, sulu nyej nyij tyámua' tyu'tyá'itzeere'en ì Dios jimi. Canu a'yan tyá'huoo mej mij ì tyétyacaa tyámua' nyojo'seejra. Tipua'aj a'yan nyetyá'xie'va'aj maj a'íimaj tyámua' nyojo'seejra, canu che' a'íin pué'een ì tì jahuiire' ì Ciríistu'.

Ciríistu' pu ì Pablo antyíhuo

¹¹ Siata'aj a'yan tyáamua'reej nye'ihuáamua', ì nyúucarij ì nyaj já'mua'ixaatye' capu ì tyeítýee jimi já'ma'can. ¹² Canu ja'ancuriáa' ì tyeítýee jimi, capu ajta a'tíj naamuá'tyej, sulu a'íj nu jimi ì Ciríistu' ja'ancuriáa', a'íi pu ajta naatá' nyej nyij jáamua'tyij.

¹³ Siajta mua'aj xu'ríj tyí'namuajraca'aj je'ej nyaj tyí'tyínyecha'íica'aj jájcuaj imuáj nyati'ij nyooj já'astyajca'aj ì huá'yi'raj ì maj Israel jitze ajtyáma'can, nyajta je'ej pua'aj huá'uuriajca'aj a'íjma ì maj jusí'rii ì Dios jimi, nyetyí'tyasa'ca'aj

nyaj néijmi'caa antyipuá'ritye'en. ¹⁴ Jéetze' nu janamuajraca'aj i nyahuásimua'ci'ij yi'ráj, nyajta nu néijmi'caa mue'tijca'aj i nyaxa'aj tyeityee i maj Israel jitze ajtyáma'can, a'íjci jime' i nyaj já'astyajca'aj i tayi'ráj. ¹⁵ Ajta ti'ij ja'ránajchaca' i Dios ti'ij na'antyíhuoonyij nyati'ij quee xu nié'huacaj, a'íi pu naatajé juxié'vi'ra' jime', ¹⁶ nyej nyij jáamua'tyij i yójra', nyajta je'en huo'té'exaatye'en i nyúucaria'ra' a'íjma i maj quee Israel jitze ajtyáma'can. Canu a'tíj jimi ja'tanyéj ti'ij a'íin tyináamua'tyej je'ej nyaj tyi'tíj jin huárinyij, ¹⁷ canu nyajta a'áa jo'mej a Jerusalén nyej nyij huó'muaarej a'íjma i maj anaquéj antyíhuaviihuaca' nyati'ij quee xu nyáaj, sulu je'en nu a'áa ja'tanyéj a Arabia, nyati'ij tányij huariá'raa a Damasco.

¹⁸ Ti'ij huéeicaj nyinyi'ra'aj mu tyojo'ma'aj, aj nu nyij a'áa jo'mej a Jerusalén nyej nyij jáamua'tyij a'íjci i Pedro, hua'puaj iteerij nu nyij á'tyeej nyaj jamuán ajo'caj. ¹⁹ Canu a'tíj a' jo'séj ti hua' jitze ajtyáma'can a'íjma i maj antyíhuaviihuaca', a'íj nu'uj i Santiago i ti ihuáaria'ra' pué'een i tavástara'. ²⁰ A'yaa nu tyajá'mua'ixaatye' tzáahuatyi'ra'aj jime' ti i Dios ajta jamua'reej nyej quee hue'tzij jin tyajá'muayu'se'ej.

²¹ Aj nu nyij tányij a'áa jo'mej i séej chuéj japua a'ájna a Siria, nyajta a Cilicia. ²² Majta a'íjma i maj Judea jo'cháatimee i maj majta Ciríistu' jimi séejre', camu nyamua'tyajca'aj. ²³ A'íj mu'uj nyúucarij namuajraca'aj tijin: "I ti ará'tyeej je'ej pua'aj ta'uuriajca'aj, ijíij pu huá'ixaatye' i

tyeítýee mej mij ja'antzaahuatye'en i nyúucarij tì ará'týeej ja'antýipuí'rityamu'ca'aj." ²⁴ Majta a'íimaj, tyámua' mu tya'tá'caria'aj i Dios nyéetzij jime'.

2

A'íi mu i maj tamuáamuata' japuan hua'puaj ará'asej jaataxié'vej a'íjci i Pablo

¹ Tì'ij arí a'yan tyoomá'caj tamuáamuata' japuan muáacuj nyinyi'ra'aj, nyajtáhua'aj nu a'áa jo'mej a Jerusalén a'íjci jamuán i Bernabé, nyajta nu a'íj jo'ví'tij i Tito. ² A'áa nu jo'mej, ji'nye i Dios pu a'yan tyinaataséjra tì a'yan tyúuxie'va'ca'aj nyaj a'áa jó'me'en. A'áa nu nyij huó'ixaaj i nyúucarij i nyaj huó'ixaaty'e'sij a'íjma i maj quee Israel jitze ajtyáma'can. Avíitzij nu jin a'yan huaríj hua' jimi i maj tyihuá'íjtye', ta'aj ij huataséjre'en nyaj quee huáapua'aj nyana'aj tyí'muarie'ca'aj. ³ Ajta quee capu a'yan tyu'ríj je'ej maj i séecan tyá'xie'va'ca'aj, ji'nye a'íjna i Tito i tì nyajamuáantaca'aj ajta hua' jitze ajtyáma'cantaca'aj i griego, camu a'yan tyaata'íj tì'ij ja'antýisíjchej i junavíj. ⁴ Séecan i maj a'yan tyúusejrataj maj tajitzé ajtyáma'can, a'íi mu avíitzij jin utyájrurij ityájma tzajta', mej mij taa'eeve'en je'ej tyaj ye'ej tyityetyitacha'íj i Círíistu' jimi, mej mij majtáhua'aj ca'nyéjrij jin tyitaata'íjtye'en i nyúucarij jime' i maj jin tyí'ijta. ⁵ Catu huo'ta' mej mij taamué'tin, ji'nye a'yaa tu tyá'xie'va'ca'aj tì ja'mua tzajta'

séjre'ej i nyúucarij ti ji're'can jime' i ti jin Dios jamui'rátoosij.

⁶ Majta a'íimaj i maj huápuí'ij juxie've', camu je'ej tyéejtyoj mej mij tyi'tíj jájcuan naaté'exaatye', ajta capu nyejitzé juxie've' a'tyán maj pué'een a'íimaj, ji'nye capu i Dios a'íj jin tyihuá'xijtye' je'ej ti síj huasé'rin. ⁷ Majta a'íimaj, a'yaa mu tyáamua'reeri' ti i Dios a'yan tyinaata'ítyaca' nyej nyij huo'té'exaatye'en i nyúucaria'ra' a'íjma i maj quee Israel jitze ajtyáma'can, a'yájna tí'ij ajta a'íj tyu'ta'ítyaca' i Pedro, tí'ij huo'té'exaatye'en i nyúucarij a'íjma i maj Israel jitze ajtyáma'can. ⁸ Ji'nye a'íjna i Dios a'íj ti huata'ítyaca' i Pedro a'íjma jimi i maj Israel jitze ajtyáma'can, a'íi pu cha'taj na'aj nyéetzij naata'ítyaca' nyej nyij a'íjma jimi ujó'me'en i maj quee Israel jitze ajtyáma'can. ⁹ Ajta a'íjna i Santiago, ajta i Pedro, ajta i Juan, a'íi mu a'íjna jin antyúumua'reeriaca'aj mej mij huó'cha'íin i maj i Dios jimi séjre', a'yaa mu tyáamua'reeri' ti i Dios a'íjna jin na'antyíhuoj, ajta ta'aj ij ootámiteere'en maj meríj taataxié'vej, a'íi mu tyámua' tyitajcha'íj muá'raa nyéetzij majta a'íjci i Bernabé, a'íi mu mij a'yan tyaaxá'pui'intarej tyej tyij ityáj ujó'ju'un a'íjma jimi i maj quee Israel jitze ajtyáma'can, majta a'íimaj a'íjma jimi i maj Israel jitze ajtyáma'can. ¹⁰ A'íi mu taatáhuaviiri' tyaj a'íjma ootámua'reej i maj quee je'ej tyéejviicue', a'íj nu nyij jin ootyényaca'an nyej nyij nyaxie'vi'ra' jin a'yan huárinyij.

Pablo pu jajtyá'xij a'íjci i Pedro a'ájna a Antoquía

¹¹ Ajta a'ájna i Pedro, ti'ij a'áa ja'tanyéj a Antoquía, nyáaj nu jajtyá'xij, ji'nye a'íi pu tyi'táj jin quee xá'pui' rijcaj. ¹² Ji'nye hua' jamuán pu tyi'cua'caria'aj a'íjma i maj quee Israel jitze ajtyáma'can, 'asta mana'aj quee séecan ará'aj i Santiago ti uhuojo'ta'ítയാca', aj pu'ij ajtáaraa hua' jimi, ajta jaatapuá'citaca' i ti hua' jamuán tyi'cua'caria'aj, ji'nye huá'tziinya'ca'aj a'íjma i maj ja'antysisí'chej i junavíj. ¹³ Majta i séecan i maj Israel jitze ajtyáma'can, camu majta a'yan huaríj huatoojé'yacan jime', sulu a'yaa mu hue'tzij jin tyúusejrataca'aj a'yájna ti'ij ajta huaríj i Pedro, a'íj pu jin ajta i Bernabé tyo'tyóohue'tzej ti'ij ij ajta a'yan huaríj mati'ij a'íimaj. ¹⁴ A'íj nu jin, nyati'ij huo'séj maj quee tzaahuatyi'ra'aj jin a'yan tyityetyúucha'íica'aj ti'ij tyé'ijta i nyúucaria'ra' i Dios, a'yaa nu nyij tyaaté'exaa a'íjci i Pedro metyi'séeracaj néijmi'i i tyeítyee tijin: “Muáaj paj hua' jitze ajtyáma'can i maj Israel jitze eeráanyej, a'yaa paj tyi'tyía'cha'ij mati'ij i maj quee Israel jitze ajtyáma'can, ¿ji'nye een jime' ca'nyéjrij jin a'yan pahuá'uurej a'íjma i maj quee Israel jitze ajtyáma'can, mej mij a'rá'astej i huá'yi'raj a'íjma i maj Israel jitze ajtyáma'can?”

Dios pu néijmi'caa tyu'túu'uunyi'raj i maj tyá'tzaahuatye'

¹⁵ Ityáj tu a'íjma jitze eeráma'can i maj Israel jitze ajtyáma'can, catu a'íjma jitze i maj ootyá'itzeerej i Dios jimi. ¹⁶ Tyajta ityáj,

a'yaa tu tyá'mua'reej tiquee a'táj ji'réenya'aj huatyá'itzeere'ej i Dios jimi, tyij ajta néijmi'i ará'astej a'íjci i nyúucarij i maj jin tyí'ijta, sulu a'íi pu ji'réenya'aj huatyá'itzeere'ej i ti tyá'tzaahuatye' i Ciríistu' jimi. A'íj tu jin tyajta ityáj tyá'tzaahuatye' i Ciríistu' jimi, ta'aj ij i Dios a'yan taatámua'tyij tyaj ji'ré'nye'ej séejre', a'íjci jime' tyej tyá'tzaahuatye' i Ciríistu' jimi, catu i tyaj ja'rá'astej a'íjci i nyúucarij i maj jin tyí'ijta. Ji'nye capu a'táj ji'réenya'aj huatyá'itzeere'ej i Dios jimi tipua'aj a'rá'astej a'íjci i nyúucarij i maj jin tyí'ijta.

¹⁷ Ajta ijíj, tipua'aj a'yan tyetyá'huocaj tyaj ji'ré'nye'ej huatyá'itzeere'en, a'yaa pu tyé'miteere' tyej tyajta ityáj á'itzeere', ¿nyiquij a'yan huatóomua'aj ti i Ciríistu' ca'nyíjra'aj taatá' tyej tyij je'ej pua'aj tyi'tyítacha'íj? Capu xaa nyu'uj. ¹⁸ Tipua'aj nyáaj tyi'táj naatyú'uunaj, nyajtáhua'aj nyij jaatyátaahuaj, nyáaj nu nyasíj pué'eenye'. ¹⁹ Ji'nye nyáaj nu huamuí' a'íjci jimi i nyúucarij i maj jin tyí'ijta, nyej nyij júurij huatyá'itzeere'en i Dios jimi. Nyáaj nu nyajta jamuán óotateehuaca' i Ciríistu', ²⁰ a'íj nu jin quee che' nyáaj júurij, sulu a'íi pu i Ciríistu' nye jimi júurij. Ajta i júuricamej i nyaj jin ijíj júurij, a'íj pu jin júurij i nyaj tyá'tzaahuatye' a'íjna jitze ma'can i yójra' i Dios, i ti naataxié'vej, ajta huatóotoj ti nyejitzé ma'can huámu'nyij. ²¹ A'íj nu jin quee majuuriésij a'íjci i ti Dios jin juxié'vi'ra' naatá', ji'nye tipua'aj a'íjna i nyúucarij i maj jin tyí'ijta tyu'tá'care'en nyej nyij ji'réenya'aj huatyá'itzeere'en, capu che' tyi'táj

huatyahuíre'nyijche' ti i Ciríistu' huamuí'.

3

I nyúucarij i maj jin tyí'ijta ajta i maj tyá'tzaahuaty'e'

¹ Mua'aj mu siaj Galacia jo'cháatimee, capu já'muai'riitye' siaj tyi'tíj jo'itéej xá'ra'nyij. ¿A'tanyíj je'ej pua'aj jamuáaruuj? A'íjci i tyaj já'mua'ixaatye' a'íj tu já'muasejratye' i maj jó'tatee a'íjci i Jesús ti ajta Ciríistu' pué'een.

² A'íj nu'uj mua'reerimu' ja'mua jimi: ¿Nyi a'yan setya'ancuriáa' i júuricama'ra' i Dios a'íjci jime' siaj ja'rá'astej i nyúucarij i maj jin tyí'ijta, ca' a'íjci jime' siaj ja'antzaahuaj i nyúucaria'ra' i Dios? ³ ¿Nyiquij huápuí'ij quee já'muai'riitye' siaj yo'itéej xá'ra'nyij, jí'nye mua'aj xu seríj a'íjci jitze aróoca'nyajca'aj i júuricama'ra' i Dios, siajta ijíj a'yan tyá'xie've' siaj a'íj ará'astej i siaj jujímua'aj siana'aj jájtyo? ⁴ ¿Nyiquee tyi'tíj je'ej tyajamuatyáhuíi i nyaj jéehua tyámua'naa tyajamuáa'ixaa? Capu je'ej tyí'rij tiquee tyi'tíj jin je'ej tyajamuatyáhuíire'en. ⁵ Tí'ij i Dios jamuaatá' i ju júuricamej, ajta je'en tyi'tíj huataséjrataca' i ja'mua tzajta', ¿jí'nye een jime' a'yan huaríj? Capu a'íjna jime' siaj ja'rá'astijrej a'íjci i nyúucarij i maj jin tyí'ijta, sulu a'íj pu jin i siaj ja'antzaahuaj i nyúucaria'ra'.

⁶ A'yaa pu cha'tána'aj i Abraham tyá'tzaahuatya'ca'aj i Dios jimi, a'íj pu jin i Dios tyámua' tyeetyájtoo, ajta jí'rénye'ej jimi huatyá'itzee. ⁷ A'yaa pu'ij tyúuxie've' siaj jáamua'reej tíjin i maj jí'récán jime' i

Abraham jitze eeráma'can, a'íi mu a'íin pué'een i maj tyá'tzaahuatye'. ⁸ Jájcuaj imuáj pu a'yan tyé'yu'si'huaca'aj i yu'xarij jitze ti i Dios a'yan ajta huo'támua'sij maj tyámua' een a'íimaj i maj quee Israel jitze ajtyáma'can i maj majta tyá'tzaahuatye', a'yaa pu tyaaté'exaatya'ca'aj a'íjci i Abraham tijin: “Néijmi'caa nu i tyeítsee tyámua' tyu'tyátoosij a jitze ma'can.” ⁹ A'íj pu jin, néijmi'i i maj tyá'tzaahuatye', Dios pu tyámua' tyihuo'tá'sij jamuán a'íjci i Abraham i ti ajta tyá'antzaahuaj.

¹⁰ A'tyán maj a'íj jitze tyí'ca'nyej i nyúucarij i maj jin tyí'ijta, a'íjma pu puéjtzij huo'ta'sij i Dios, ji'nye a'yaa pu tyé'yu'si' i yu'xarij jitze tijin: “Puéjtzij pu jaci'tyij a'tíj ti quee néijmi'i já'astijre' je'ej ti ye'ej tyé'yu'si' i yu'xarij jitze i maj jin tyí'ijta.” ¹¹ A'íj tu jin a'yan tyá'mua'reej ti quee a'tíj ji'réenya'aj séejre' ti néijmi'i ará'astej i nyúucarij i maj jin tyí'ijta, ji'nye a'yaa pu ajta tyé'yu'si' i yu'xarij jitze tijin: “A'íjna i ti naa tyí'tyevij, a'íi pu júurij huatyá'itzeere'ej a'íjci jime' i ti tyá'tzaahuatye'.” ¹² Ajta a'íjna i nyúucarij i maj jin tyí'ijta capu a'íj jitze ma'can i maj jin tyá'tzaahuatye', sulu a'yaa pu tyá'xaj tijin: “A'íjna i ti ja'astej i nyúucarij i maj jin tyí'ijta, a'íj pu jin a'yan tyi'cháaj ja'mej.”

¹³ Ciríistu' pu tajapuá huatanyúj, ti'ij quee puéjtzij táaci'tyij a'íjci jime' tyaj quee ja'astej i nyúucarij i maj jin tyí'ijta, a'íi pu tajitzé ma'can jaapuéjtzitariaca', ji'nye a'yaa pu tyé'yu'si' i yu'xarij jitze tijin: “Puéjtzij pu jaci'tyij a'tíj ti mui'nyij jo'tatéehuj i ciyéj jitze.” ¹⁴ A'yaa pu

a'íjci jin tyu'ríj ta'aj ij huo'ci'tyij i Dios ti jin tyámua' tyihuo'tyátoosij, a'íjma i maj quee Israel jitze ajtyáma'can, tyata'aj tyij tyajta néijmi'i a'íjna jitze ma'can i tyaj jin tyá'tzaahuatye' ja'ancuriá'an i júuricama'ra' i Dios i ti jin tya'tóoratziiri'.

I nyúucarij i maj jin tyí'ijta capu jo'rio'uunaj i Dios ti jin tya'tóoratziiri'

¹⁵ Nye'ihuáamua', a'íj nu jamuaté'eexaatye'ej je'ej ti tyí'rinyacaa i tyeítyee jimi, tipua'aj a'tíj tyi'tíj jin atóoratyij ajta jo'yú'xaj je'ej ti rinyij, capu i'ríj ti a'tíj jo'rio'uunaj nusu ti jéetze' jitzán tyo'yú'xaj. ¹⁶ Ajta ijíj, Dios pu a'yan tya'táratziiri' a'íjci i Abraham ajta i ti jitzán eeráma'can. Capu i yu'xarij a'yan mui'caa tyi'tyáxajta, sulu síj pu'uj i ti jitzán eeráma'can, a'íi pu'ij a'íin pué'een i Ciriístu'. ¹⁷ A'yaa pu huatóomua'aj i nyaj já'mua'ixaatye' tijin: Dios pu tyi'tíj jin tya'tóoraj i Abraham jimi, a'yaa pu'ij ajta tya'róo'astej. A'íj pu jin i nyúucaria'ra' i Moisés ti'ij yan huataséjre a'yan tyoomá'caj muáacuaj anxityej nyinyi'ra'aj japuan seityéj japuan tamuáamuata', capu i'ríj ti i nyúucarij jo'rio'uunaj ti'ij quee che' tyi'tíj huiiria'aj i Dios ti jin tya'tóoraj. ¹⁸ Ji'nye tipua'aj i Dios ti jin tya'tóoratziiri', a'íj jitze aróoca'nyaj i nyúucaria'ra' i Moisés, capu che' a'íin pue'éenye'ej ja'mej i Dios ti jin tya'tóoratziiri', ajta i Dios pu a'yan tya'tóoratziiri' ti juxié'vi'ra' jin tyámua' tyeetyátoonyij a'íjci i Abraham.

¹⁹ ¿Tyi'tanyí na'aj ij je'ej tyí'huiire' i nyúucarij i maj jin tyí'ijta? A'yaa pu hua' jimi

tyu'tyátuiihuaca', mej mij jáamua'reej i maj jin ootyá'itzee i Dios jimi, 'asta na'aj quee huataséjre a'íjna i ti jitzán eeráma'can i Abraham, i ti jitzán i Dios tya'tóoratziiiri'. Ajta i nyúucarij i maj jin tyí'ijta, a'íi mu i maj tajapuá tyí'huiire' hua' jimi jaatyájtoo i tyeítyee, a'íjna jitze ma'can i Moisés. ²⁰ Ajta ti'ij i Dios a'yan tya'táratziiri' a'íjci i Abraham, capu a'tíj huata'ítയാ', sulu jusíj pu a'yan huaríj, ajta síj na'aj a'íin pué'een i Dios.

I ti jin tyí'huiire' a'íjna i nyúucarij i maj jin tyí'ijta

²¹ ¿Nyiquij a'yan huatóomua'aj ti seequéj tyá'xaj i nyúucarij i maj jin tyí'ijta a'íjci i Dios ti jin tya'tóoratziiiri'? Capu xaa nyu'uj, ji'nye tipua'aj i nyúucarij i maj tyí'ijta júuricamej tatá'care'en, a'yaa pu'ij tyi'ríitacaj tyaj ji're'nye'ej huatyá'itzeere'en i Dios jimi a'íjci jime' tyaj ja'astej i nyúucarij i maj jin tyí'ijta.

²² Ajta a'íjci i yu'xarij jitze a'yaa pu tyá'xaj tyaj néijmi'i ootyá'itzee i Dios jimi, mata'aj mij a'tyán maj tyá'tzaahuatye' i Ciriístu' jimi huatái'riitarij maj ja'ancuriá'an a'íjci i ti jin Dios tya'tóoratziiiri'.

²³ Ti'ij quee xu huataséeria'caj i tyaj jitzán tyá'tzaahuatye', a'íj tu jin eetyánami'huaca'aj i nyúucarij i maj jin tyí'ijta, a'yan tyetye'ejcho've'ej ti huataséjre'en a'íjna i tyaj jitzán tyá'antzaahuatye'en. ²⁴ A'íjna i nyúucarij i maj jin tyí'ijta a'yaa pu tyí'tacha'íica'aj ti'ij i ti ca'nyéjrij jin tyí'muarie' ti'rúj ti tyiséjra, 'asta na'aj quee uvé'nye'ej i Ciriístu', ta'aj ij i tyaj

jìn tyá'antzaahuatye'sij taatá'an tyaj ji'ré'nye'ej huatyá'itzeere'en. ²⁵ Ajta ijíj tì arí huataséjre ì tyaj jitzán tyá'tzaahuatye', capu che' a'ín tacha'ij ì nyúucarij ì maj jìn tyí'ijta, ²⁶ ji'nye a'íjna jime' ì siaj jìn tyá'tzaahuatye' ì Círíistu' jimi, néijmi'i xu mua'aj yójmua'mua' pué'een ì Dios, ²⁷ ajta siati'ij jimi huatyá'itzee ì Círíistu' a'ájna siati'ij huái'huaca', aj pu ajta jamue'ré'chejtya'xij. ²⁸ Capu che' a'ín juxie've' tipua'aj Israel jitze pua'ajtyáma'cantaj, na'ríj a'íjma jimi ì Griego, tipua'aj ì tì juxáahuaj majo'cha'can, na'ríj ì tì ca'nyéjrij jìn tyí'huiire', tipua'aj tyáati' nusu íiti', ji'nye néijmi'i xu mua'aj ì Círíistu' jitze ajtyáma'can, a'íj xu jìn síj siana'aj pué'een jimi. ²⁹ Ajta tipua'aj Círíistu' jitze xa'ajtyáma'can, a'íj xu jìn siajta a'íj jitze eeráma'can ì Abraham, ajta a'ín tyajá'muaci'tyij ì tì jìn Dios tya'tóoratziiri'.

4

¹ A'yaa pu huatóomua'aj ì nyaj já'mua'ixaatye' tíjìn: Tí'ij ooj pa'ri'istan a'íjna ì tì néijmi'i tyá'ci'tyij, a'yaa pu cha'tána'aj een tí'ij síj tì ca'nyéjrij jìn tyí'muarie', tyij ajta arí néijmi'i tyia'ra'an tyi'pué'een ² Séecan mu jacha'ij, majta a'íjna jìn antyúumua'reej maj tyú'cha'ín néijmi'i ì tì tyía'ra'an, 'asta na'aj quee tya'rá'astij a'náj tì ì táatajra' a'yan tyaaxá'pui'intari'ri'. ³ A'yaa pu cha'taj ityájma jimi tyé'yi'ij, tyati'ij quee xu tyi'tíj mua'rériacaj, a'íj pu tyí'ta'ijtya'ca'aj íyan tì tyí'sejre' ì cháanacaj japua. ⁴ Ajta tí'ij atyojo'ré'nyej a'náj tì a'yan tyu'xá'pui'intari'huaca', Dios

pu juyó j ujo'ta'ítyaca', i ti huanie'huaca' i íitaj jítze, ajta a'yan tya'rá'astej i nyúucarij Moisés ti jo'yú'xaca', ⁵ ta'aj ij a'ín tajapuá huatányuunyij, ji'nye a'íi pu tyí'ta'ijtya'ca'aj i nyúucarij i maj jin tyí'ijta, ajta je'en taatá'an tyej tyij huátatyamua've'en a'íjna jime' tyaj tyeríj yójmua'mua' pué'een i Dios. ⁶ Ajta tyaj tyeríj yójmua'mua' pué'een, Dios pu yo'ta'ítyaca' i júuricama'ra' i juyó j i taxiéjnyu'caa tzajta', ajta i júuricama'ra' a'yaa pu tyá'huo tijin: "Muáaj paj nyatáataj pué'een, i nyaj jéehua jaxie've'." ⁷ A'yaa pu'ij, capáj che' ca'nyéjrij jin tyí'muarie', sulu yójra' paj pué'een i Dios, ajta ijíj paj períj yójra' pué'een, Dios pu a'yan tya'ajxié'vi'ra' pej pij néijmi'i jimi tya'ancuriáan.

Pablo pu je'ej tyóomua'ajcaa a'íjma jimi i maj tyá'tzaahuatye'

⁸ Jájcuaj imuáj, siati'ij quee xu jamua'tyáacaj i Dios, mua'aj xu ca'nyéjrij jin huá'huúria'ca'aj a'íjma i maj a'yan hua'tamuá'muaj tijin dioosij. ⁹ Ajta ijíj siaj seríj jamua'tyej i Dios, nusu ijíj ti arí i Dios já'muamuajtye, ¿ji'nye tyí'rij siaj sij siajtáhua'aj ca'nyéjrij jin tyu'tyáhuúire'en a'íjci jimi i tiquee tyi'táj huúire', ajta ti'ij ajtáhua'aj ca'nyéjrij jin tyajamuaata'íjtye'en? ¹⁰ Mua'aj xu tyí'ye'estyaa, ti'ijta a'ájna atyojo'ré'nyej a'náj ti tyi'táj je'ej huaríj, na'ríj i máxcirie' ti jitzán tyi'táj atyojo'ré'nyesij, nusu i nyinyi'ra'aj i maj jitzán a'yan tyá'mua'reej tyi'táj jime'. ¹¹ A'íj nu jin jéehua tyí'tziinye' tipua'aj quee tyi'táj huatyáhuúire'en i nyaj jin tyu'muáriej ja'mua tzajta'.

12 Nye'ihuáamua', a'yaa nu tyaja'muahuaviij siaj a'yan rijcaj nyati'ij nyáaj, ji'nye nyáaj nu nyajta a'yan tyi'tyínyecha'ij siati'ij mua'aj. Caxu siaj mua'aj tyi'tíj jin ootyá'itzeerej nye jimi. 13 A'yájna siati'ij seríj tyá'mua'reej, nyati'ij anaquéej jamuaaté'exaa i nyúucaria'ra' i Dios, a'yaa nu tyi'cuí'ij nyati'ij a'yan huaríj. 14 A'íjna i nyaj jin tyí'cui'ca'aj, jéehua pu jamuaata-muárie'ristej, siajta mua'aj caxu naataxána'vej, caxu siajta naatyáxaahuataca', sulu tyámua'xu tyinaatyéeje ti'ij nyaj a'ín pué'eenye' síj ti tajapuá tyí'huiire', na'riij yaa ti'ij nyaj a'ín pué'eenye' i Ciríistu' ti ajta Jesús pué'een. 15 ¿Ji'nye huaríj a'íjna i siaj jin jutyamua'va'ca'aj? A'yaa pu tyí'rij nyaj a'yan tyaataxáj ja'mua jime' yee tipua'aj a'yan tyí'riitacajche', mua'aj xu je'tatú'tu'nyijche' i juji'sij siaj sij nyéetzij naatatú'tu'tye'en. 16 Arí ijíj, ¿nyij seríj nyéjcha'íire' a'íjci jime' nyaj tzáahuatyira'aj jin tyajá'mua'ixaatye'?

17 A'íjma jimi i tyeítyee jéehua xu hua'jitze juxie've', majta quee a'íjna jime' mej mij tyámua' jamuáa'uurej. A'yaa mu tyá'xie've' siaj sij tajimí ajtácinyej, siaj sij siajta mua'aj hua'jitze tyú'ca'nyej. 18 A'yaa pu tyí'xa'pui' maj ja'mua jitze juxié'va'aj i séecan, siaj sij tyámua'huó'uurej, ajta a'náj tina'aj a'yan tyúuxie've', capu a'áa na'aj tipua'aj nyijta ja'mua jamuán a'áa jó'catyij. 19 Nyiyóojmua', jéehua nu jappuéjtzij ja'mua jime', a'yájna ti'ij i íiti' ti jo'tacuí'nyaca' pá'ri'ij jime', 'asta na'aj quee i Ciríistu' ja'mua jimi tyámua' tyu'tyá'itzeere'en.

²⁰ Canu a'tzúj jamua'reej je'ej nyaj ye'ej huárinyij mua'ajmaj jime'. Nyóoche' a'áa jó'catyiiche' ja'mua jimi nyej nyij quee che' tyajá'muayu'se'ej nyana'aj, sulu nyej nyij tyajamuáa'ixaatye'en senyeséeracaj.

Je'ej maj huaríj a'íjna i Agar, ajta i Sara, i tyaj jin yo'itéej tá'ra'nyij

²¹ Siata'aj naaté'exaatye' mua'aj mu siaj jaxie've' siaj sij ja'rá'astyaj a'íjci i nyúucarij i maj jin tyí'ijta, ¿nyitzaa sequée a'yan tyáanamujri' je'ej ti tyá'xaj a'íjci jitze i nyúucarij? ²² A'yaa pu tyé'yu'si' ti i Abraham hua'puácaa tyiyójmua'ca'aj i maj tyétyacaa. Síj pu jitzán huanie'huaca' a'íjci i ítaj ti ca'nyéjrij jin tyí'muarie'ca'aj, ajta i síj, a'íi pu jitzán huanie'huaca' a'íjci i ítaj ti juxáahuaj jo'chá'canya'aj. ²³ A'íjna i ti huanie'huaca' a'íjci jitze i ítaj ti ca'nyéjrij jin tyí'muarie'ca'aj, a'íi pu a'yan éenye'ej huanie'huaca' mati'ij i tí'ríj. Ajta i síj, a'íjna i ti huanie'huaca' jitzán i ítaj ti juxáahuaj jo'chá'canya'aj, a'íi pu a'íjci jin huanie'huaca' ti Dios a'yan tya'tóoratziiri'. ²⁴ F'rij tyaj a'yan tyaataxáj ti a'yan huatóomua'aj a'íjna i nyúucarij ti a'yan tyé'yu'si'. A'íimaj i úucaa i maj hua'puaj, a'yaa pu huatóomua'aj i nyúucarij ti hua'puaj ti jin Dios tyihuo'ta'íj i tyétyacaa. Síj i nyúucarij pu a'áa já'ma'can i jiríj japua ti a'yan tyaja'rájtyapuj tijin Sinaí. A'íj mu jitzán eerányesij a'íimaj i tí'ríj i maj tyu'tyáhuire'sij ca'nyéjrij jime'. Ajta a'íjna i nyúucarij, a'íj pu'ricij a'íjna i íiti' ti a'yan

ántyapuaj tijin Hagar. ²⁵ A'íjna i Hagar, a'yaa pu huatóomua'aj a'íjna i jiríj i Sinaí, a'áa ti jo'tácaj a Arabia. A'yaa pu ajta huatóomua'aj chájta' ti já'sejre' a Jerusalén, ji'nye óoche' pu ca'nyéjrij jin tyí'muarie' jamuán i yójmua'mua'. ²⁶ Ajta a'íjna i Jerusalén tajapuá ti já'ma'can, a'íi pu juxáahuaj jo'cha'can. Ajta a'íi pu pu'éeen i taj náanaj. ²⁷ A'yaa pu'uj na'aj ji'nye a'yaa pu tyé'yu'si' tijin:

Pajta muáaj, tiquee che' muo'tacuí'nyij, pata'aj huatá'tyamua've'en.

A'yaa paj huárinyij, ji'nye jéehua paj tyiyóomua'aj puá'mej

mu paj quee a'náj ootájucataca'

quee a'íjna i íiti' ti víche'.

²⁸ Siajta mua'aj, nye'ihuáamua', a'yaa xu cha'taj siana'aj séejre' ti'ij a'íjna i Isaac ti a'íjci jin eeráanyej i ti jin Dios a'yan tya'tóoratziiri'.

²⁹ A'ájna ímuáj a'íjna i yójra' ti a'yan cha'tána'aj éenye'ej huanie'huaca' mati'ij i ti'ríij, a'íi pu je'ej pua'aj jáaruuj a'íjci i yójra' ti huanie'huaca' a'íjci jime' i muárie'ria'ra' i júuricama'ra' i Dios. Ajta íjij, a'yaa pu cha'taj tyí'rinyacaa. ³⁰ Ajta, ¿ji'nye tyá'xaj i yu'xarij jitze? Nyiquij a'yan yee: "Pata'aj jaatamuáaritye'en a'íjci i íitaj ti ca'nyéjrij jin tyí'muarie', pajta i yójra', ji'nye capu a'náj tyi'táj jaci'tyij a'íjci i yójra' i íitaj ti ca'nyéjrij jin tyí'muarie', sulu néijmi'i pu tyá'ci'tyij a'íjci i yójra' i íitaj ti juxáahuaj jo'cha'can." ³¹ A'íj pu jin, nye'ihuáamua', catu a'íjci jitze eeráanyej a'íjci i íitaj ti ca'nyéjrij jin tyí'muarie'ca'aj. Catu

xaa nyu'uj, sulu a'íj tu jitzán eeráanyej a'íjci i íitaj ti juxáahuaj jo'chá'canya'aj.

5

Maj quee tooa'care'en maj ca'nyéjrij jin tyí'huüre'ej

¹ Ciríistu' pu tii'rájtoo tyej tyij taxáahuaj mahuací'ca'an. A'íj xu jin caxu che' tooa'care'en siaj sij ca'nyéjrij jin tyí'muarie'ej, caxu che' huariá'ci'ca'an a'yájna siati'ij tyityaajú'ca'aj.

² Sianáanamujri'. Nyáaj i nyaj Pablo pué'een, a'yaa nu tyajá'mua'ixaatye'. Típua'aj a'yan setyityaató'aan maj ja'antyísiichixi'in i ta'antyuuví'rajmee i siaj jitzán sa'racia, ti'ij tyá'xaj i nyúucarij maj jin tyí'ijta capu tyi'táj jin jamuaatyáhuüre'ej i Ciríistu'. ³ A'yaa nu tyaaté'exaatye'sij tzáahuatyi'ra'aj jime' a'táj tina'aj ti ja'antyisíjchej i junavíj, a'yaa pu jimi tyuuxié've'ej ja'mej ti'ij néijmi'i ará'astej i nyúucarij i maj jin tyí'ijta. ⁴ Mua'aj mu siaj a'yan tyá'huoo siaj ji'r'é'nye'ej huatyá'itzeere'en i Dios jimi, mua'aj xu seríj ajtacíj a'íjci jimi i Ciríistu', siajta ajtacíj a'íjci jimi i Dios ti tyámua' tyajamuaatá'. ⁵ Tyajta ityáj, a'íj tu jitze arataca'nyáaj i júuricama'ra' i Dios a'yan tyetyi'ijcho've'ej tyej tyij ji'r'é'nye'ej huatyá'itzeere'en i Dios jimi a'íjci jime' i tyaj jin tyá'tzaahuatye'. ⁶ A'yaa pu tyí'een, ji'nye i Ciríistu' jimi, capu a'tzúj jitzán juxie've' típua'aj a'táj arí ja'antyisíjchaca' i junavíj nusu quee. A'íi pu xaa jitzán juxie've' ti a'táj a'yan tyihuo'taxié've'en i tyeítyee tzáahuatyi'ra'aj jime'.

⁷ Tyámua' xu seríj mua'aj tyityaajú'ca'aj i juyéj jitze. ¿A'tanyíj tyajamuantyí'uunyi'ri' siaj sij quee che' já'astyaj a'íjci i nyúucarij ti jì'ré'can jìme'? ⁸ Capu a'íin ca'nyíjra'aj jamuaatá' i Dios i ti jamuaatajé. ⁹ A'yaa mu tyí'xaj ti caira'tzuj i levaduura'j néijmi'i tyináxcaj i cuéjtzij, ¹⁰ a'íj nu jín nyáaj i tavástara' jitze tyí'ca'nyej siaj mua'aj quee seequéj tyí'mua'tyij, ajta i Dios pu puéjtzij jaatá'sij a'íjci i ti tyajamua'antyí'uunyi', ajta quee je'ej rinyij a'tíj ti pué'een.

¹¹ Ajta nyéetzij jìme', nye'ihuáamua', tipua'aj nyooj a'yan tyajá'mua'ixaatye'ej siaj ja'antyísiichixi'in i junavíj, camu che' je'ej pua'aj nya'uurényijche' a'íimaj i maj Israel jitze ajtyáma'can, jì'nye capu je'ej pua'aj hua'namuaaraste'ej ja'mej i nyúucarij nyaj já'mua'ixaatye' ti i Ciriístu' óotateehuaca' i cúruuj jitze. ¹² Ajta a'íjma jìme' i maj a'íjci jín tyajamua'antyíu'nyi', a'yaa pu tyina'ráanajchi nyéetzij maj anaquéej a'íimaj jujímmua'aj huatyóosiichixi'in.

¹³ Siajta mua'aj nye'ihuáamua', Dios pu jamuaatajé siaj sij juxáahuaj mahuací'ca'an. Ajta caxu a'íjci jín a'yan rijcaj siaj sij a'yan cha' siana'aj je'ej pua'aj rijcaj je'ej ti tyajamuá'miteeraste'. Sulu siata'aj juxie've' huatóohuüre'en séej jamuán siajta séej. ¹⁴ Ji'nye néijmi'i pu i nyúucarij i maj jín tyí'ijta séej na'aj jitze tya'róo'astee i ti a'yan tyá'xaj tíjin: "Pata'aj jaxie've' i axa'aj tyévíj a'yájna patí'ij asíj tyí'axie've'." ¹⁵ Tyámua' xu'uj mua'aj, jì'nye tipua'aj mua'aj je'ej pua'aj setyúuxajta na'ríj

siooj jujíimua'aj tyúucha'íire'ej, mua'aj xu sij jujíimua'aj antyúupua'ritye'sij.

I ti tatzájta' eerányinyii, ajta i ti jitzán eerányinyii i júuricama'ra' i Dios

¹⁶ A'íj nu jin a'yan tyí'xaj tijin: Siata'aj a'yan tyí'tyechajcaj a'íjci jitze xa'rooca'nyéej i júuricama'ra' i Dios, siaj sij quee tyi'táj jin je'ej pua'aj rijcaj i ti ja'mua tzajta' tye'rányinyii.

¹⁷ Ji'nye je'ej ti tyá'xie've' i ti je'ej pua'aj een, a'íi pu jájcha'íire' i júuricama'ra' i Dios, ajta a'íjna i júuricama'ra' i Dios a'íi pu ajta jájcha'íire' i ti je'ej pua'aj een. A'íi mu a'yan tyityetyúucha'íire', a'íj xu jin mua'aj quee a'náj a'yan rinyij je'ej siaj tyá'xie've'. ¹⁸ Ajta tipua'aj i júuricama'ra' i Dios tyaja'muamua'tyej, capu ij che' mua'ajmaj tyaja'mua'íitya'aj ja'mej i nyúucarij i maj jin tyí'ijta.

¹⁹ Tyámua' pu tyé'miteere' je'ej maj ricij a'íimaj i maj ja'astej i ti je'ej pua'aj een, a'íi mu juxana'cire' séecan jamuán i maj quee jatyévi'tin, huápuí'ij mu xána'visi' ricij a'íj mu mij jin meríj jó'vej, ²⁰ a'íi mu hua'najchej i sáanturij, majta tyí'chahuaa. Jéehua mu juxana've', majta quee tyámua' ja'huóomua'raj, majta óochueere'. Jéehua mu tyo'cájaaxiejve', majta séecan jaaxiejtye', majta jé'ta' huaci'ij, majta séecan jimi ajtyú'uuvej. ²¹ Jéehua mu tyihuá'chueere', majta juta'rujve', majta tyí'nyacua'aj, majta néijmi'i jin a'yan ricij i ti je'ej pua'aj tyí'een. A'yaa nu nyij mua'ajmaj

tyajá'mua'ixaatye', a'yájna nyati'ij nyáaj ny-erij jájcuaj imuáj huaríj, tijn i maj a'yan tyityetyúucha'ij camu ujo'tyárutyij jo'tij i Dios tyejé'ijtaj.

²² Ajta a'ijna i júuricama'ra' i Dios ti tyihuata'caa, a'íi pu a'íin pué'een tyej tyámua' tyihuojó'mua'raj, ajta tyámua'vi'ra'aj, ajta tyaj taxáahuaj séjre'ej, tyaj néijmi'i jin tyo'táviicue', tyajta huo'xié've'en séecan i tyeityee, tyajta tyihuo'tapuéjve'en, tyajta quee tyi'tij jin á'itzeeria'aj, ²³ tyaj quee á'tatzaahuatye'ej, ajta hua' jitze séejre' i ti xá'pui'. Capu ij ajtáhua'aj síj séejre' i nyúucarij ti tyi'tij jin hua' jitze pua'ritye'ej. ²⁴ Majta i maj jitzán ajtyáma'can i Ciríistu' ti ajta Jesús pué'een, mu'rij néijmi'i tyu'táxaahuataca' i ti je'ej pua'aj tyí'een ti eerányinyiica'aj i hua' tzajta' mej mij quee che' je'ej pua'aj tyityetyúucha'ij. ²⁵ Tipua'aj a'ij jin tyajúurij i júuricama'ra' i Dios, tyiche' tyajta tyu'tá'an ti'ij i júuricama'ra' i Dios tu'cájuyetyej.

²⁶ Tyiche' quee á'tatzaahuatye'ej, tyajta quee ca'nyíjra'aj tatá'care'en tyej tyij je'ej pua'aj á'tamua'raj nusu tyej tyij tajímua'aj tyítajaaxiejvi'.

6

Miche' huatóohuüre'en síj ajta síj

¹ Nye'ihuáamua', tipua'aj séej a'tij xaaséj ti ootyá'itzeere'en tyi'tij jime', siata'aj mua'aj mu siaj i júuricama'ra' i Dios jitze aróoca'nyej jaatáhuüre'en. Ajta siati'ij a'yan huárinyij tyámua' xu'uj siaj síj quee a'yan cha'taj siana'aj

tyityo'tyá'itzeere'en tí'ij a'íin tyo'tyá'itzee.
² Siata'aj huatóohuüre'en séej jamuán siajta séej,
 a'yaa xu sij a'íci jin tya'rá'astej i nyúucaria'ra' i
 Ciriistu'.

³ Tipua'aj a'tíj a'yan tyé'miteeraste'ej tí tyi'tíj
 jin antyúumua'reej, ajta quee tyi'tíj jin an-
 tyúumua'reej, a'íi pu jusíj jucuanamuaj. ⁴ Che'
 síj ajta síj jusíj huóosej je'ej tí tyi'tyúucha'ij,
 ajta tipua'aj tyi'tíj jin óotzaahuatya'mui'ij, che'
 a'íjna jime' je'ej tí jusíj tyi'tyúucha'ij, che' quee
 i séecan jime'. ⁵ Ji'nye a'yaa pu tyúuxie've'
 tí síj ajta síj a'yan tyó'viicue' je'ej tí tyi'tíj
 tyá'muarie'riste'.

⁶ A'íjna i tí jumua'tyej i nyúucaria'ra'
 i tavástara', a'yaa pu tyúuxie've' tí
 jaatyáhuüre'en a'íci i tí tyá'mua'tyej.

⁷ Caxu mua'aj jucuanamuaj, capu i'ríj siaj
 jáacuanamuaj i Dios. Tyi'tíj siaj mua'aj tyu'tá',
 a'yaa xu cha'taj siana'aj tya'ancuriáa'sij. ⁸ A'íjna
 i a'tíj tí a'íj jimi tyí'muarie' i tí je'ej pua'aj een,
 a'yaa pu tyá'ci'tyij tí huámu'nyij. Ajta a'tíj tí a'íj
 jimi tyí'muarie' i júuricama'ra' i Dios, a'íi pu i
 júuricama'ra' i Dios jaatá'sij tí júurij já'ra'nyij
 jusén jime'. ⁹ A'íj tu jin tyiche' quee jaxaahuataj
 i tyaj jin xá'pu' ricij, ji'nye tipua'aj tyequée
 jaxaahuataj tyi'tíj tu ancuriáa'sij a'ájna xicáara'
 jitze je'ej tí tye'tyévijtye'. ¹⁰ A'íj pu jin, a'náj tyaj
 a'yan tya'ajxié'vi'ra'aj, tyiche' tyámua' huó'uurej
 i taxa'aj tyeítyee, tyajta jéetze' tyámua' tyi-
 huó'cha'íin a'íjma i maj majta tyá'tzaahuatye'.

*Maj tyámua' tyeeséj tí'ij quee a'tíj
 huo'cuanamuan*

¹¹ Tyámua' xu mua'aj tyeeséj je'ej nyaj va'cán jin tyé'yu'xaj i nyamuáca' jime'. ¹² A'íimaj i maj já'mua'itziitye', majta a'yan tyí'tyese' siaj sij ca'nyéjrij jin ja'antysisíchej i junavíj, a'yaa mu ricij mej mij i tyeítyee tyámua' huojos'ejra camu jaxie've' ti puéjtzij huo'ci'tyij a'íjci jime' maj ja'rá'astee a'íjci i Ciriístu' i ti óotateehuaca' i cúruuj jitze. ¹³ Ajta a'íimaj i maj ja'antysisíchej i junavíj, camu ja'rá'astyaa i nyúucarij i maj jin tyí'ijta. A'yaa mu tyá'xie've' siaj mua'aj ja'antysisíchej i junavíj, mej mij a'íjci jin ahuóotzaahuatye'en siaj a'íjci jin a'yan huaríj. ¹⁴ Nyajta nyáaj canu tyi'táj jin á'nyatzaahuatye', sulu a'íj nu jin á'nyatzaahuatye' ti Ciriístu' nyej jitze ma'can jaapuéjtzitariaca' i cúruuj jitze. Ji'nye a'íjna jitze ma'can i cúruujra' i Ciriístu', capu che' i cháanacaj nye jimi séejre', nyajta nyáaj canu nyajta che' i cháanacaj japua séejre'. ¹⁵ Capu tyi'táj huiire' tipua'aj a'táj ja'antysisíchaca' i junavíj nusu quee, a'íi pu juxie've' ti a'táj jájcuan jin huanie'huaj i Dios jimi. ¹⁶ Che' Dios huo'tyápua'ritye'en, ajta hua'ancu'vajxi'in a'chu maj pua'máj ja'rá'astee a'íjci i nyúucarij, majta néijmi'i i maj Israel jitze ajtyáma'can i tyeítyeristyamua'me'en i Dios. ¹⁷ Ijij ti yujo'que'tij ja'mej canu che' jaxie've' ti a'táj nya'itziitya'aj, ji'nye pu'ríj nye jitze séejre' a'íjci jime' i nyaj jajpuéetzij i Jesús jitze ma'can. ¹⁸ Nye'ihuáamua', che' i tavástara' i Jesús ti ajta Ciriístu' pué'een, che' a'íin tyámua' tyajamuaatá'an i ja'mua tzajta'. Che' a'yan tyá'ra'nyij.

**I nyúucarij ti jájcua ti a'ijna á'xaj i
Tavástara' i Jesús ti Ciríistu' pue'een ajta
Salmos
Cora, Santa Teresa: I nyúucarij ti jájcua ti a'ijna
á'xaj i Tavástara' i Jesús ti Ciríistu' pue'een ajta
Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

4f03662f-a4e0-5c7c-a13b-0b7002b5b8f6